



## *Intrudusaun*

Iha Outubru 2014, Unidade Justisa ba Feto no Labarik (*Women's and Children Justice Unit WCJU*) kontinua monitoriza kazu violénsia bazeia ba jéneru iha jurisdisaun Tribunál Distritál Dili no Baucau. WCJU konsege monitoriza kazu 20 husi Tribunál Distritál Dili no kazu 3 husi Tribunál Distritál Baucau liu husi julgamentu movél iha Distritu Manatuto.

Husi kazu 23 ne'e, kazu 22 klasifikadu nu'udar krime ofensa ba integridade fízika simples ho natureza violénsia doméstika, kazu 1 klasifika nu'udar krime ofensa ba integridade fizika grave ho natureza violénsia doméstika no kazu 1 involve krime tentativa abuzu seksuál ba menór.

Entre kazu hirak ne'e, kazu mak 4 tribunál kondena ho pena multa, kazu 11 kondena ho pena prizaun maibé nia ezekusaun suspendidu, kazu 1 absolve, kazu 1 kondena ho pena admoestasaun, kazu 7 seluk sei iha prosesu nia laran.

Tuir mai deskripsaun sumáriu julgamentu ba kazu kompletu:

### **1. Krime ofensa ba integridade fízika simples ho natureza violénsia doméstika Nú.**

#### **Prosesu: 457/14/TDDIL**

Kompozisaun Tribunál	: Juis singular
Juis	: Dr. Antoninho Goncalves
Ministériu Públiku	: Dra. Ivonia Maria Guterres
Defeza	: Dr. José da Silva (defensória públiku)
Konkluzau	: Sei kontinua prosesu

Iha 13 Outubru 2014, tribunál julga arguidu JCCM tanba komete krime violénsia doméstika hasoru nia feen, iha Distritu Dili.

Ministériu Públiku akuza katak iha 6 Marsu 2013, arguidu tuku dala ida iha lezada nia ulun, tuku dala rua iha matan loos no basa dala rua iha ibun. Agresaun ne'e rezulta lezada sofre moras no bubu iha ulun, matan no ibun. Alende asaltu fiziku hirak ne'e, arguidu mós uza tudik ameasa atu oho mate lezada. Kazu akontese tanba wainhira arguidu fila husi servisu hare lezada hemu hela tua sabu no la prepara han meudia ba arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples no artigu 157 Kódigu Penál kona-ba krime ameasa konjuga ho artigu 2, 3 no 35 Lei Kontra Violénsia Doméstika.

Iha tribunál, arguidu deklara katak faktus ne`ebé loos mak arguidu ameasa atu oho mate lezada, tanba to'o iha uma hare lezada nia matan bubu, tanba lezada nia aman mak baku.

Iha parte seluk lezada depoimenta katak faktus husi akuzasaun ne'e lo'os hotu, tanba iha momentu ne'ebá nia hetan kanek no ran sai husi ibun no inus. Relasaun ho krime ameasa, tribunál omologa tanba lezada deziste keixa hasoru arguidu katak sira di'ak malu ona.

Iha alegasaun finál ministériu públiku husu ba tribunál atu kondena arguidu ho pena prizaun fulan 6 suspende ba tinan 1 tanba arguidu provadu komete krime hasoru lezada.

Defeza konklui katak nia duvida ba faktus hirak ne'e, tanba tuir deklarasaun arguidu katak antes ne'e lezada nia matan bubu tanba lezada nia aman rasik mak baku. Tanba ne'e, husu ba tribunál atu absolve arguidu husi krime ne'e.

Depoizde rona tiha alegasaun husi parte sira, tribunál marka fali agenda julgamentu ba leitura sentensa iha 28 Outubru 2014, tuku 17:00 lokraik.

## **2. Krime ofensa ba integridade fízika simples ho natureza violénsia doméstika Nú. Prosesu: 199/13.TDDIL**

Kompozisaun tribunál	: Juis singular
Juis	: Dr. Julio Gantes (Juis internasionál)
Ministériu Públiku	: Dra. Ivonia Maria Guterres
Defeza	: Dr. Manuel Sarmento (defensória públiku)
Konkluzau	: Kondena ho pena prizaun fulan 3 suspende ba tinan 3.

Iha 14 Outubru 2014, Tribunál Distritál Dili julga arguidu MJT ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 28 Marsu 2014, arguidu nervozu hodi fatuk tuda lezada maibé la kona, arguidu rakut lezada nia fuk no basa lezada ho lamina ne`ebé arguidu ka'er hela no kona iha lezada nia hasan hetan kanek no ran. Arguidu mós lori espellu baku lezada la kona tanba lezada se'es aan. Motivu husi akontesimentu ne'e, tanba arguidu ho lezada diskute malu kona-ba osan aluga uma nian.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa no deklara katak faktus iha akuzasaun ne'e loos hotu, arepende ba nia hahalok no diak malu ona ho lezada.

Iha parte seluk, lezada iha ninia depoimentu kontinua reforsa akuzasaun maibe lezada deklara katak to'o agora sira seidak di'ak malu.

Iha alegasaun final, ministériu públiku konsidera faktus hotu provadu tanba arguidu konfesa no konfirma ho lezada. Ministeriu Públiku hanoin katak atu halo prevensaun ba krime hanesan iha futuro, husu ba tribunál atu kondena arguidu ho pena prizaun fulan 6 suspende ba tinan 1.

Defeza konklui katak arguidu konfesa ba faktus hotu, arepende ba nia hahalok, tanba ne'e husu ba tribunál atu aplika pena ne'ebé kmaan ba arguidu.

Depoizde avalia faktus provadus sira ne'ebé mak produz durante julgamentu, tribunál konklui prosesu ne'e hodi kondena arguidu ho pena prizaun fulan 3 no suspende ba tinan 3.

### **3. Krime ofensa ba integridade física simples ho natureza violência doméstica- Nú. Prosesu 328/14/TDDIL**

Kompozisaun Tribunál	: Juis singular
Juis	: Dra. Jumiaty Freitas
Ministériu Públiku	: Dra. Ivonia Maria Guterres
Defeza	: Dr. Olga Bareto Nunes (defensória pública)
Konkluzau	: Sei kontinua prosesu

Iha 20 Outubru 2014, Tribunál Distritál Dili julga arguidu YM ne'ebé komete krime violência doméstica hasoru nia feen, iha Distritu Dili.

Ministériu Públiku akuza katak iha 21 Jullu 2011, arguidu rasta lezada ba liur, tuku dala barak iha lezada nia isin lolon, tebe dala barak iha kotuk laran no rasta lezada nia fuk too lezada monu ba rai. Motivu husi akontesimentu ne'e tanba arguidu atu hola fetu kiik.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violência Doméstica.

Iha tribunál, arguidu deklara katak nia la tuku no la rakut lezada nia fuuk, maibé basa deit. Arguidu mós deklara katak depoizde akontesementu sira di'ak malu kedas. Alende ne'e, lezada mós depoimenta katak depoizde akontesementu arguidu arepende ba nia hahalok no durante ne'e sira di'ak malu ona.

Iha alegasaun finál, ministériu públiku husu ba tribunál atu kondena arguidu ho pena prizaun fulan 6 suspende ba tinan 2 tanba arguidu provadu komete krime hasoru lezada.

Defeza argumenta katak arguidu arepende nia hahalok, konfesa parsial ba faktus husi akuzasaun no di'ak malu ona ho lezada, tanba ne'e, husu ba tribunál atu kondena arguidu ho pena multa US\$30.00.

Depoizde alegasaun husi parte sira, tribunál marka fali agenda julgamentu ba leitura sentensa iha 27 Outubru 2014, iha tuku 10:00 dadersan.

#### **4. Krime ofensas ba integridade fízika simples ho natureza violénsia doméstika - Nú. Prosesu 549/14/TDDIL**

Kompozisaun tribunál	: Juis singular
Juis	: Dra. Zulmira da Silva
Ministériu Públiku	: Dr. Hipolito Santa
Defeza	: Dr. José da Silva (defensória públiku)
Konkluzan	: Sei kontinua prosesu

Iha 22 Outubru 2014, Tribunál Distriál Dili julga arguidu JM ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 19 Marsu 2012, arguidu ho lanu hakilar lezada no hadau lezada nia pasta no dudu monu lezada ba rai, tebe iha kotuk laran no tuku iha kotuk laran. Lezada halai, arguidu lori tudik duni tuir atu sona lezada maibé la konsege toman. Motivun husi akontesementu ne'e tanba lezada sai servisu fila ba uma tarde.

Ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu la marka prezensa, mezmu tribunál notifika ona dala tolu no hasai mós mandadu kapturasaun maibé la hetan arguidu nia paraderu.

Lezada depoimenta katak alende aktus ne`ebé arguidu komete, durante sira mórís hamutuk arguidu sempre baku hela de'it lezada maibé lezada mak la hatu'o denuncia.

Iha alegasaun finál, ministériu públiku husu ba tribunál halo alterasaun kualifikasaun husi artigu 145 krime ofensa ba integridade fízika simples ba artigu 154 kona-ba krime maus tratus ba kónjuje. Tuir avaliasaun husi ministériu públiku katak kazu ne'e prienxe elementu krime maus tratus ba kónjuje.

Defeza husu ba tribunál atu mantein ho krime ofensa ba integridade fízika simples ho natureza violénsia doméstika no husu ba tribunál fo kastigu ne'ebé kmaan.

Tribunál konsidera faktus ne'e prienxe elementu krime maus tratus ba kónjuje, tanba ne'e deside halo alterasaun ba kualifikasaun no distribui ba julgamentu koletivu. Tuir artigu 275 Kódigu Prosesu Penál kona-ba alterasaun substansial ba faktus iha akuzasaun, tuir alinea 5 katak kuandu faktus foun hamosu inkompentensia ba tribunál, tenke haruka autus ba tribunál ne'ebé iha kompeténsia atu hala'o julgamentu foun.

**5. Krime ofensa ba integridade fízika simples iha natureza violénsia doméstika- Nú. Prosesu: 526/14/TDD**

Kompozisaun tribunál	: Juis singular
Juis	: Dra. Jumiaty Freitas
Ministériu Públiku	: Dra. Lidia Soares
Defeza	: Dra. Marcia Sarmiento (defensória públiku)
Konkluzau	: Sei kontinua prosesu

Iha 22 Outubru 2014, Tribunál Distritál Dili, julga arguidu AS ne'ebé komete krime violénsia doméstika hasoru nia feen, Iha Distritu Dili.

Ministériu Públiku akuza katak iha 8 Agostu 2010, arguidu basa dala rua iha lezada nia hasan no matan laran no kauza bubu no kanek iha matan no hasan. Kazu ne'e akontese tanba arguidu no lezada diskute malu kona-ba arguidu la ba buka servisu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa katak nia basa lezada tanba lezada hirus kona-ba arguidu seidauk hetan servisu. Arguidu deklara arepende ba nia hahalok no depoisde akontesementu sira di'ak malu fali.

Iha alegasaun finál, ministériu públiku husu ba tribunál atu kondena arguidu ho pena prizaun fulan 6 no suspende ba tinan 1 fulan 6 tanba arguidu porvadu komete krime hasoru lezada.

Defeza husu tribunál atu fo kastigu ne'ebé kmaan ba arguidu tanba arguidu konfesa, arepende ba nia hahalok, premeiraves komete krime, diak malu ona no responsavel ba nia familia.

Depoisde rona tiha alegasaun husi parte sira, tribunál marka fali agenda julgamentu baleitura sentensa iha 30 Outubru 2014, iha tuku 14:00 lokraik.

## 6. Krime tentativa abuzu seksuál ba menór - Nú. Prosesu: 606/14.TDD

Kompazisaun tribunál : Juis koleтиву  
Juis : Dr. José Maria (reprezenta juiz koleтиву)  
Ministériu Públiku : Dra. Lidia Soares  
Defeza : Dr. Sergio Paulo Dias Quintas (defenória públiku)  
Konkluzau : Kondena ho pena prizaun tinan 3 suspende ba tinan 4

Iha 23 Outubru 2014, Tribunál Distritál Dili prejide leitura akordaun hodi kondena arguidu DB ne`ebé komete krime tentative abuzu seksuál ba menór, iha Distritu Dili.

Tribunál prova katak iha 9 Feveireiru 2014, lokraik arguidu lori lezada ba vizita nia avo ne`ebé moras. Fila husi vizita ne`e to`o iha dalan klaran, arguidu kaer lezada nia kabas halo monu lezada ba rai no tenta tu`ur iha lezada nia leten ho intensaun atu halo relasaun seksuál lezada.

Ministériu Públiku akuza arguidu kontra artigu 177 Kódigu Penál kona-ba krime abuzu seksuál ba menór konjuga ho artigu 22, 23 no 24 Kódigu Penál kona-ba aktu preparatoriu, tentativa no tentativa nia punibilidade.

Tribunál prova mós katak lezada esforsu hodi tebe arguidu nia hirus matan kauza arguidu monu ba rai, lezada aproveita halai hodi ba informa ba nia inan-aman. Tribunál mós prova katak momentu akontesementu, lezada nia idade seidauk to`o tinan 12.

Aleinde ne`e, tribunál prova katak lezada viziñu ka hela besik malu ho arguidu, bain-bain ajuda fa`an arguidu nia ai-maran. Arguidu mós dala ruma ajuda fó osan sentavus 0.20 to`o 0.50 ba lezada tanba ajuda faan arguidu nia ai-maran.

Tribunál prova katak arguidu provadu komete krime tentativa abuzu seksuál ba menór maibé tanba arguidu konfesa faktus husi akuzasaun, arepende ba nia hahalok no deklarara katak ba futuru sei la repete tan hahalok ne`e.

Depoide avalia faktus provadus sira ne`ebé mak produs durante julgamentu, tribunál konklui prosesu ne`e no kondena arguidu ho pena prizaun tinan 3 suspende ba tinan 4 no selu mós kustu judisiál US\$20.07. **Krime ofensa ba integridade fizika grave ho natureza violénsia doméstika- Nú. Prosesu: 434/2014/TDD**

Kompozisaun tribunál : Juis koleтиву  
Juis : Dr. Antonio Helder do Carmo  
: Dra Jacinta Correia da Costa  
: Dra. Jumiaty Freitas  
Ministériu Públiku : Dra. Ivonia Maria Guterres  
Defeza : Dra. Olga Nunes (defensória públiku)

Konkluzau

: Sei kontinua prosesu

Iha 24 Outubru 2014, Tribuná Distritál Dili, julga arguidu MS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 26 Agostu 2011, arguidu hodi ai-suak baku iha lezada nia rento'os nune'e kauza kanek. Motivu husi agresaun ne'e tanba arguidu husu osan, lezada dehan osan laiha.

Tuir fali iha 9 Dezembru 2013, arguidu kontinua hodi tudik sona iha lezada nia liman no lori bloku tuda iha lezada nia ibun no rezulta lezada hetan kanek iha liman no nehan 4 monu-sai, kanek iha ibun no hetan suku pontu 8.

Ministériu Públiku akuza arguidu kontra artigu 146 Kódigu Penál kona-ba ofensa ba integridade fízika grave konjuga ho artigu 35 Lei Kontra Violénsia Doméstika.

Iha tribunál, arguidu deklara katak iha 26 Agostu 2011, arguidu la tuda lezada maibé lezada mak hodi bloku tuda iha arguidu nia ain-tu'ur no rezulta kanek.

Arguidu mós deklara katak iha 9 Dezembru 2013, arguidu la sona lezada maibé lezada mak lori mane ida (deskonfia lezada nia amante) tama sira-nia uma. Arguidu mós deklara katak istori malu ho mane ne'e. Arguidu hodi fatuk atu tuda mane ne'e maibé tanba mane ne'e sees tiha, mak fatuk ba kona fali iha lezada nia ibun.

Lezada depoimenta katak arguidu pratika duni aktu ne'e hasoru lezada. Agresaun hirak ne'e, rezulta kanek iha ren-toos, liman, ibun suku pontu 8 no nehan fuan 4 monu. Too ohin loron arguidu ho lezada hela separadu.

Tribunál konfirma ho testamuña ASB (arguidu ho lezada nia oan feto), testamuña deklara katak iha 9 Dezembru 2013 nia hare arguidu sona lezada ho tudik maibé la kona lezada nia isin. Testamuña deklara mós katak akontesementu iha 26 Agostu 2011, nia la hare no motivu ba problema hirak ne'e testamuña la hatene.

Iha alegasaun finál, ministériu públiku husu ba tribunál atu kondena arguidu ho pena prizaun tinan 5 tanba provadu komete krime hasoru lezada no halo lezada nia nehan fuan 4 monu.

Defeza konsidera provas hirak ne'e hamosu konfuzau tanba deklarasaun arguidu, depoimentu lezada no testamuña kontrariu, tanba ne'e defeza husu ba tribunál atu absolve arguidu husi kazu ne'e.

Depoizde rona tiha alegasaun husi parte sira, tribunál marka fali agenda julgamentu ba leitura sentensa iha 6 Novembru 2014, iha tuku 10:00 dadersan.

**8. Krime ofensa ba integridade fizika simples ho natureza violénsia doméstika - Nú. Prosesu: 0145/2014/TDB.**

Kompozisaun tribunál : Juis singular  
Juis : Dr. Hugu da Cruz Pui  
Ministériu Públiku : Dr. Pascasio de Roza Alves  
Defeza : Dr. Jonas H. Da Costa (defensória públiku)  
Konkluzasaun : Kondena ho pena multa

Iha 27 Outubru 2014, Tribunál Distritál Baucau liu husi julgamentu movel iha Distritu Manatuto, julga arguidu TdO ne'ebé komete krime violénsia doméstika hasoru nia feen, Iha Distritu Manatuto.

Ministériu Públiku akuza katak iha 16 Janeiru 2014, arguidu lori ai-kabelak baku iha lezada nia kabas karuk no kauza lezada sente moras. Kazu ne'e akontese tanba arguidu fila husi servisu husu hahan no lezada hatan katak hahan iha sanan hela.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa faktus hotu ne'ebé konsta iha akuzasaun, deklara arepende no promete sei la komete tan krime hanesan hasoru lezada.

Ministériu Públiku hare katak arguidu konfesa integralmente, husu ba tribunál atu presindi (la presiza rona) depoimentu lezada iha futuru

Iha alegasaun final, ministériu públiku konsidera katak, arguidu konfesa integralmente, kolabora diak ho tribunál, tanba ne'e husu ba tribunál atu aplika pena ne'ebé justu no adekuadu.

Defeza konsidera katak arguidu foin primeravez komete krime, konfesa, husu ba tribunál atu aplika pena admoestasaun ba arguidu.

Depoizde avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena multa US\$30. Tribunál fixa mós pena alternativa loraun 40 iha prizaun, se arguidu la kumpri pena multa ne'e.

**9. Krime ofensa ba integridade fizika simples ho natureza violénsia doméstika- Nú. Prosesu: 0009/2014/TDD.**

Kompozisaun tribunál : Juis singular  
Juis : Dr. Hugu da Cruz Pui  
Ministériu Públiku : Dr. Pascasio de Roza Alves  
Defeza : Dr. Jonas H. Da Costa (defensória públiku)  
Konkluzasaun : Sei kontinua prosesu



Iha 27 Outubru 2014, Tribunál Distritál Baucau liu husi julgamentu movel iha Distritu Manatuto, julga arguidu FdS ne'ebé komete krime violénsia doméstika hasoru nia feen DS ho nia oan NSD, iha Distritu Manatuto.

Ministériu Públiku akuza katak iha 27 Novembru 2013, arguidu lori fiu baku dala ida iha lezada NSD nia kotuk laran no kauza bubu. Arguidu tuku lezada DS dala rua iha rentos no kabas depois riba tun ba rai no sama iha ain-tuur no kauza bubu no kanek. Kazu ne'e akontese tanba lezada NSD soe hela karosa iha natar laran no lezada DS lori ai-padasuk baku lezada NSD, maibé kona fali iha arguidu nia liman.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu rekuza katak nia la riba lezada DS ba rai no la sama lezada. Arguidu deklara katak nia tuku deit dala rua halo lezada monu ba rai no rezulta ain-tuur kanek.

Lezada DS deklara katak arguidu tuku dala rua iha rentos no kotuk laran too lezada monu ba rai, maibé lezada mós deklara katak rai bokon ne'e mak halo nia monu ba rai.

Enkuantu lezada NSD depoimentu katak nia hare arguidu lori fiu baku dala ida iha kotuk laran no tuku dala rua halo lezada DS monu tun ba rai.

Iha alegasaun finál, ministériu públiku konsidera katak arguidu konfesa, foin primeiravez komete krime, tanba ne'e husu ba tribunál atu aplika pena prizaun tinan 1 maibé substitui ho pena multa.

Defeza iha alegasaun hare katak arguidu foin primeiraves komete krime, konfesa, no promete iha futuru sei la komete tan krime hanesan hasoru lezada. Deklarasaun ne'e konsidera nu'udar sirkunstánsia atenuante, tanba ne'e husu ba tribunál atu aplika pena ne'ebé la limite arguidu nia liverdade.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 10 Novembru 2014, oras tuku 14:00 lokraik.

**10. Krime ofensa ba integridade simples ho natureza violénsia doméstika -Nú. Prosesu: 0019/2014/TDD.**

Kompozisaun tribunál	: Juis singular
Juis	: Dr. Hugo da Cruz Pui
Ministériu Públiku	: Dr. Pascasio de Roza Alves
Defeza	: Dr. Jonas H. Da Costa (defensór públiku)
Konkluzasaun	: Kondena ho pena admoestasaun

Iha 28 Outubru 2014, Tribunál Distritál Baucau liu husi julgamentu movel iha Distritu Manatuto, julga arguidu SS ne`ebé komete krime violénsia doméstika hasoru nia feen, iha Distritu Manatuto.

Ministériu Públiku akuza katak iha 28 Dezembru 2013, arguidu lori raga plastik tuda iha lezada nia kotuk laran no kauza bubu no moras. Aktu ne`e akontese tanba arguidu la satisfas hare lezada haruka arguidu nia alin mak tein.

Tuir mai, iha 31 Janeiru 2014, laiha motivu ne`ebé klaru, arguidu lori telefone tuda tan iha lezada nia hirus matan no kauza lezada sente moras.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál arguidu konfesa, arepende, no deklara ba tribunál katak sei la komete tan krime hanesan hasoru lezada iha futuru.

Ministériu Públiku konsidera katak arguidu konfesa totalmente faktu sira hotu, tanba ne`e husu ba tribunal atu la presija rona tan deklarasaun husi lezada. Iha alegasaun finál, ministériu públiku hanoin katak arguidu foin primeiraves komete krime, konfesa nia salan, tanba ne`e husu ba tribunál atu aplika pena ne`ebé mak adekuaudu no justu ba arguidu.

Defeza argumentu katak arguidu kolabora diak ho tribunál, tanba ne`e husu ba tribunál atu aplika pena ne`ebé mak la lemite arguidu nia liberdade.

Depoizde avalia faktus provadus sira ne`ebé mak produz durante julgamentu, tribunál konsidera arguidu provadu komete krime hasoru lezada, tanba ne`e tribunál konklui prosesu ne`e no kondena arguidu ho pena admoestasaun.

## **11. Krime ofensa ba integridade fízika simples ho natureza violénsia doméstika-Nú. Prosesu: 753/2014/TD Dili**

Kompozisaun tribunál	: Juis singular
Juis	: Dra. Jumiaty Freitas
Ministériu Públiku	: Dr. Matias Soares
Defeza	: Dr. Sebastião Amado (defensória públiku)
Konkluzaan	: Kondena pena multa

Iha 10 Outubru 2014, Tribunál Distritál Dili, prejide leitura sentensa ba arguidu DG ne`ebé komete krime violénsia doméstika hasoru nia feen, iha Distritu Ermera.

Ministériu Públiku akuza katak iha 29 Outobru 2014, arguidu baku dala tolu iha lezada nia kanuruk, rentos no hasan. Kazu ne`e akontese tanba arguidu ho lezada diskute malu kona-ba osan ne`ebé arguidu gasta hotu no lezada diskunfia arguidu fo'o ba fetu seluk ka nia amante.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál arguidu konfesa integralmente kona-ba faktu sira, hatudu nia arependementu no deklarata katak ho lezada moris separadu. Tribunál halo konfirmasaun ba lezada, lezada deklarata katak arguidu komete duni krime ne'e hasoru lezada, no agora dadaun sira hela separadu.

Iha alegasaun finál, ministériu públiku haktuir katak arguidu provadu komete krime hasoru lezada, no atu halo prevensaun ba krime violénsia doméstika husu ba tribunál kondena arguidu ho pena prizaun tinan 1 suspende ba tinan 1 fulan 6.

Iha parte seluk defeza husu ba tribunál atu konsidera sirkunstánsia atenuante ba arguidu, tanba arguidu kolabora ho tribunál hodi deskobre verdade, arepende nia hahalok, tanba ne'e husu ba tribunál atu fo'o pena suspensaun ki'ik liu husi pena suspensaun ne'ebe Ministériu Públiku husu.

Depoizde avalia faktus provadu sira ne'ebé mak produz durante julgamentu, tribunál konklui prosesu ne'e no kondena arguidu ho pena multa US\$ 40.00. Tribunál mós fixa pena alternativa loron 40 iha prizaun, se arguidu la kumpri pena multa ne'e.

## **12. Krime ofensa ba integridade fízika simples ho natureza violénsia doméstika-Nú. Prosesu: 694/2014/TD Dili**

Kompozisaun tribunál	: Juis singular
Juis	: Dra. Jumiaty Freitas
Ministériu Públiku	: Dr. Jasinto Babo
Defeza	: Dr. Manuel Sarmiento (defensória públiku)
Konkluzau	: Kondena ho pena multa

Iha 22 Outobru 2014, Tribunál Distritál Dili, prejide leitura sentensa no kondena arguidu JdC ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 5 April 2014, arguidu baku, tuku tebe lezada nia kotuk laran no basa iha lezada nia hasan loos. Kazu ne'e akontese tanba lezada fase hela ropa, nia kuiñada ho motor liu hodi hakilar dehan hare ba selu ona ema nia tusan. Tanba ne'e depoizde fase ropa, lezada ba kedas nia kuiñada nia uma hodi dehan se atu husu osan di'ak liu ba uma, nusa mak hakilar iha dalan deit. Arguidu rona lezada ho nia alin feto diskute malu, tanba ne'e arguidu halo agresaun hasoru lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu hili direitu nonok. Maske nune'e, iha parte seluk lezada kontinua konfirma katak faktus ne'ebé konsta iha akuzasaun ne'e loos hotu.

Iha alegasaun finál, ministériu públiku haktuir katak arguidu provadu komete krime hasoru lezada, tanba mezmu arguidu hili direitu nonok maibe lezada depoimenta katak faktus ne'ebé iha akuzasaun loos hotu. Tanba ne'e, atu halo prevensaun ba krime violénsia doméstika, husu ba tribunál atu kondena arguidu ho pena prizaun tinan 1 suspende ba tinan 1 fulan 6.

Defeza husu ba tribunál atu konsidera sirkunstánsia atenuante sira hanesan arguidu mak xefe familia no responsabiliza ba lezada, tanba ne'e husu ba tribunal fo'o pena suspensaun ki'ik liu husi suspensaun ne'ebé ministériu públiku husu.

Depoizde avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena multa US\$45.00 Tribunál mós fixa pena alternativa loraun 40 iha prizaun, se arguidu la kumpri pena multa ne'e.

### **13. Krime ofensa ba integridade fízika simples ho natureza violénsia doméstika-Nú. Prosesu: 736/2014/TD Dili**

Kompozisaun tribunál	: Juis singular
Juis	: Dra. Jumiaty Freitas
Ministériu Públiku	: Dr. Matias Soares
Defeza	: Dr. Sebastião Amado (defensória públiku)
Konkluzaan tinan 1	: Kondena arguidu ho pena prizaun fulan 6 suspende ba tinan 1

Iha 10 Outobru 2014, Tribunál Distritál Dili liu husi julgamentu movél iha Distritu Ermera, julga arguidu AL ne'ebé komete krime violénsia doméstika hasoru nia feen, iha Distritu Ermera.

Ministériu Públiku akuza katak iha 8 Novembru 2013, arguidu foti fatuk ida tuda iha lezada nia kelen karuk. Kazu ne'e akontese tanba arguidu ho lezada diskute malu kona-ba lezada ba partisipa iha reuniaun kona-ba tara-bandu, maibe depoizde fila husi reuniaun la hatutan informasaun ne'e ba arguidu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus sira ne'ebé deskreve iha akuzasaun, arepende nia hahalok no di'ak malu ona ho lezada. Tanba ne'e, Ministériu Públiku presindi deklarasaun lezada nian tanba arguidu konfesa totalmente ba faktus iha akuzasaun.

Iha alegasaun finál, ministériu públiku haktuir katak arguidu provadu komete krime violénsia doméstika hasoru lezada. Tanba ne'e, atu halo prevensaun ba krime ne'e, husu ba tribunál kondena arguidu ho pena prizaun tinan 1 fulan 6 suspende ba tinan 2.

Defeza husu ba tribunál atu konsidera sirkunstánsia atenuante sira hanesan arguidu kolabora diak ho tribunál hodi deskobre verdade no hatudu nia arependementu, tanba ne'e husu ba tribunál kondena arguidu ho pena prizaun fulan 6 suspende ba tinan 1.

Depoisde avalia faktus provadus sira ne`ebé mak produz durante julgamentu, tribunál konklui prosesu ne`e no kondena arguidu ho pena prizaun fulan 6 suspende ba tinan 1.

**14. Krime ofensa ba integridade fízika simples ho natureza violénsia doméstika-Nú.  
Prosesu: 557/2014/TD Dili**

Kompozisaun tribunál : Juis singular  
Juis : Dra. Ana Paula Fonseca  
Ministériu Públiku : Dr. Renato Bere Nahak  
Defeza : Dr. Sebastião Amado (defensória públiku)  
Konkluzau : Kondena ho pena prizaun fulan 10 suspende ba tinan 1  
fulan 2.

Iha 1 Outubru 2014, Tribunál Distritál Dili, prejide leitura sentensa ba arguidu JdCS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 23 Fevereiru 2014, arguidu lori ai-sar baku lezada nia kotuk laran, basa no tuku iha lezada nia kotuk laran no rezulta lezada monu ba rai. Depoisde lezda monu ba rai, arguidu kontinua tuku no tebe lezada. Kazu ne`e akontese tanba arguidu fila husi Taibesi ho lanu, to'o iha uma lezada laiha, lezada ba tiha nia alin nia uma.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus iha akuzasaun, hatudu arependementu no deklara katak depoisde akontesementu liu tiha arguidu ba husu kedas diskulpa ba lezada ninia familia.

Ministériu Públiku konsidera katak arguidu konfesa integralmente ba faktus, tanba ne`e, husu atu la presija rona tan depoimentu husi lezada.

Iha alegasaun finál, ministériu públiku deklara katak arguidu provadu komete krime violénsia doméstika hasoru lezada. Atu halo prevensaun ba krime ne`e, husu ba tribunál kondena arguidu ho pena suspensaun.

Defeza hato`o katak tanba arguidu kolabora ho tribunál hodi deskobre verdade, hatudu nia arependementu konsidera nu`udar sirkunstánsia atenuante, tanba ne`e husu ba tribunal atu fo pena multa ba arguidu.

Depoisde avalia faktus provadus ne`ebé mak produs durante julgamentu, tribunál konklui prosesu ne`e no kondena arguidu ho pena prizaun fulan 10 suspende ba tinan 1 fulan 2.

**15. Krime ofensa ba integridade fízika simples ho natureza violénsia doméstika-Nú.  
Prosesu: 76/2014/TD Dili**

Kompozisaun tribunál : Juis singular  
Juis : Dra. Jumiaty Freitas  
Ministériu Públiku : Dr. Nelson de Carvalho  
Defeza : Dr. Fernando Lopes (defensória públiku)  
Konkluzau : Absolve

Iha 1 Outubru 2014, Tribunál Distritál Dili, absolve krime violénsia doméstika, ho razaun tanba tribunál la hatene arguidu ho vítima nia hela fatin,

Ministériu Públiku akuza katak iha 22 Janeiru 2012, arguidu basa dala tolu iha lezada nia hasan. Kazu ne'e akontese tanba wainhira arguidu fila husi Manatuto no sente hamlaha, maibe to'o iha uma lezada laiha, arguidu ba buka lezada no hetan iha lezada nia familia nia uma.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, ministériu públiku husu atu absolve arguidu husi krime ne'e tanba arguidu ho lezada la marka prezensa iha audensia julgamentu maske tribunál fo ona karta notifikasaun. Alende ne'e sira ninia hela fatin mós la klaru.

**16. Krime ofensa ba integridade fízika simples ho natureza violénsia doméstika-Nú.  
Prosesu: 643/2014/TD Dili**

Kompozisaun tribunál : Juis singular  
Juis : Dr. Antonio Helder  
Ministériu Públiku : Dr. Reinato Bere Nahak  
Defeza : Dr. Marsal Mascarinhas (defensória públiku)  
Konkluzau : Kondena ho pena prizaun tinan 1 suspende ba tinan 2

Iha 3 Outubru 2014, Tribunál Distritál Dili, prejide leitura sentensa ba arguidu JV ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 19 Novembru 2012, arguidu basa, buti iha kakorok no tuku iha lezada nia matan fukun. Kazu ne'e akontese tanba lezada hakilar hodi husu osan ne'ebé arguidu debe hela.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu rejeita katak nia la buti lezada nia kakorok no tuku lezada nia matan fukun. Arguidu deklarata katak faktus ne'ebé loos mak basa lezada, maibe tanba lezada ba husu osan ho hakilar de'it, maske sira hela separa ona. Maske nune'e, lezada kontinua konfirma katak, arguidu komete duni krime ne'e hasoru lezada tuir akuzasaun, no agora dadaun sira hela separadu ona.

Iha alegasaun finál, ministériu públiku haktuir katak arguidu konfesa parsial, agora hela sira hela separadu, husu ba tribunál kondena arguidu ho pena suspensaun.

Defeza husu ba tribunál atu konsidera sirkunstánsia atenuante sira hanesan arguidu kolabora ho tribunál, hatudu nia arependementu, tanba ne'e husu ba tribunál atu fo pena ne'ebé kaman.

Depoide avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena prizaun tinan 1 suspende ba tinan 2 no selu mós kustu judisial US\$20.

### **17. Krime ofensa ba integridade fízika simples ho natureza violénsia doméstika-Nú. Prosesu: 399/2014/TD Dili**

Kompozisaun tribunál	: Juis singular
Juis	: Dra. Fransisca Cabral
Ministériu Públiku	: Dr. Hipolito Santa
Defeza	: Dr. Rui Guterres (defensória públiku)
Konkluzau	: Kondena ho pena multa

Iha 3 Outubru 2014, Tribunál Distritál Dili, prejide leitura sentensa no kondena arguidu JdC ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 27 Jullu 2014, arguidu hodi ai-sar baku lezada nia kotuk laran dala lima no tuku iha matan fukun to'o ran. Problema ne'e mosu tanba arguidu fila husi Same hare uma laran foer. Arguidu hirus no husu ba lezada katak “durante loron ida tomak lezada halo saida. Lezada ho lian makas hatan katak nia hare katuas moras no husu ba arguidu katak se hare uma laran foer arguidu bele sar tiha.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál arguidu konfesa integralmente ba faktus iha akuzasaun, hatudu nia arependementu no deklarara katak akontesementu ne'e liu tiha arguidu ba husu diskulpa ba familia lezada nian. Tanba arguidu konfesa ministériu públiku husu atu la presija rona tan deklarason husi lezada.

Iha alegasaun finál, ministériu públiku haktuir katak arguidu provadu komete krime hasoru lezada. Atu halo prevensaun ba krime ne'e husu ba tribunál kondena arguidu ho pena suspensaun.

Defeza husu ba tribunál atu konsidera sirkunstánsia atenuante sira hanesan arguidu kolabora ho tribunál hodi deskobre verdade, hatudu nia arependementu, tanba ne'e husu ba tribunál kondena arguidu ho pena multa.

Depoide avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena multa US\$ 45.00.

**18. Krime ofensa ba integridade fízika simples ho natureza violénsia doméstika-Nú.  
Prosesu: 103//2014/TD Dili**

Kompozisaun tribunál : Juis singular  
Juis : Dra. Jumiaty Freitas  
Ministériu Públiku : Dra. Ivonia Guterres  
Defeza : Dra. Marcia Sarmento  
Konkluzau : Kondena ho pena prizaun tinan 1 suspende ba tinan 2.

Iha 17 Outubru 2014, Tribunál Distritál Dili, prejide leitura sentensa no kondena arguidu JBCM ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak maisumenus iha fulan Dezembru 2013, arguidu rakut lezada nia liman, hadau telefoni no basa dala ida iha lezada nia hasan. Kazu ne`e akontese tanba arguidu ho lezada diskute malu tanba wainhira arguidu telefone lezada la foti, no arguidu diskunfia lezada koalia hela ho mane seluk ka nia amante.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu deklara katak, rekuza katak nia la basa no la rakut lezada. Arguidu deklara mós katak nia atu foti de`it telefoni ne`ebé lezada uza hodi telefoni ema seluk. Maibe lezada deklara katak faktus iha akuzasaun ministériu públiku nian loos hotu, no arguidu sempre halo violénsia hasoru lezada.

Iha alegasaun finál, ministériu públiku haktuir katak arguidu konfesa parsial ba faktus, arguidu ho lezada hela separadu tanba ne`e, husu ba tribunál kondena arguidu ho pena suspensaun. Enkuantu defeza husu ba tribunál fo pena ne`ebé kman ba arguidu.

Depoide avalia faktus provadus sira ne`ebé mak produz durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

**19. Krime ofensa ba integridade fízika simples ho natureza violénsia doméstika-Nú.  
Prosesu: 139/2014/TD Dili**

Kompozisaun tribunál : Juis singular  
Juis : Dra. Jumiaty Freitas  
Ministériu Públiku : Dr. José Landim  
Defeza : Dra. Martinha da Costa (advogada estajiáda)  
Konkluzau : Kondena ho pena prizaun tinan 1 suspende ba tinan 2.

Iha 17 Outubru 2014, Tribunál Distritál Dili, prejide leitura sentensa no kondena arguida EDdC ne`ebé komete krime violénsia doméstika hasoru nia feen, iha Distritu Dili.



Ministériu Públiku akuza katak iha 28 Dezembru 2012, arguida lori tudik sona lezadu nia motor nomos sona iha lezadu nia kabun kauza kanek suku pontu 3. Problema ne'e akontese tanba lezadu dun katak arguida mak foti nia osan US\$20.00 iha kalsa bolsu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguida deklara katak nia hirus tanba lezadu (nia laen) dun nia mak foti osan US\$20.00 iha lezadu nia kalsa bolsu. Arguida deklara mós katak wainhira lezadu atu lori motor sai, arguida lori tudik sona iha motor nia selin (tuur fatin), maibe tudik kona fali iha lezadu nia kabun.

Depoisde konfirma ho lezadu, deklara katak, iha momentu ne'ebá nia atu ba familia nia uma, nia dudu sai motor rona arguida hakilar dehan katak "hein lai ita rezolve lai o nia osan ne'ebé lakon." Iha momentu ne'eba arguida koa hela modo, no halai ba hakbesik lezadu hodi prenda nia motor, arguida haksasuk malu ho lezadu. Lezadu deklara katak arguida ninian atu sona motor nia selin (tuur fatin) maibe lezadu kaer metin arguida ho nune'e arguida hikis an hodi kona lezadu nia kabun.

Iha alegasaun finál, ministériu públiku haktuir katak arguida konfesa ba faktus, no deklara katak la'ós atu sona lezadu maibe sona motor nia tu'ur fatin mak kona fali lezadu nia kabun. Sira diak malu ona, arguida arepende nia hahalok no promote katak sei la komete tan krime hanesan iha future. Tanba ne'e atu halo prevensaun ba krime violénsia doméstika husu ba tribunál kondena arguida ho pena prizaun fulan 3 suspensaun ba tinan 1.

Defeza husu ba tribunál atu konsidera sirkunstánsia atenuante sira hanesan arguida kolabora ho tribunál hodi deskobre verdade, hatudu nia arependementu, tanba ne'e husu ba tribunál atu fo pena ne'ebé kaman.

Depoisde avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguida ho pena prizaun tinan 1 suspende ba tinan 2.

## **20. Krime ofensa ba integridade fízika simples ho natureza violénsia doméstika-Nú. Prosesu: 808/2014/TD Dili**

Kompozisaun Tribunál	: Juis singular
Juis	: Dra. Julmira da Silva
Ministériu Públiku	: Dr. Felisminio Cardoso (Prokuradór internasionál)
Defeza	: Dra. Laura Valente Lay (defensória públiku)
Konkluzau	: Kondena ho pena prizaun fulan 6 suspende ba tinan 1

Iha 20 Outubru 2014, Tribunál Distritál Dili, prejide leitura sentensa no kondena arguidu FMS ne'ebé komete krime violénsia doméstika hasoru nia oan, iha Distritu Liquisa.

Ministériu Públiku akuza katak iha 9 Agostu 2014, arguidu lori ai-sanak baku lezada (nia oan) nia ain dala barak, arguidu mós foti tudik ameasa atu oho lezada. Kazu ne'e akontese tanba

arguidu sai husi haris fatin, husu nia telefone iha lezada atu uza, maibé lezada uza hela telefone ba halimar game.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu rekuza faktus sira husi akuzasaun no deklara katak faktus balu loos no balu la loos. Arguidu deklara la-lori tudik ameasa atu oho lezada, maibe arguidu lori deit ai-sar mak baku dalabarak iha lezada nia ain. Iha audénsia ne'e, arguidu hatudu nia arependementu no deklara katak iha futuru sei la komete tan krime hanesan hasoru lezada.

Ministériu públiku konsidera katak arguidu konfesa hotu ne'e mak presinde tia deklarasaun husi lezada nian. Iha alegasaun finál, ministériu públiku haktuir katak arguidu provadu komete krime violénsia doméstika hasoru lezada. Atu halo prevensaun ba krime ne'e, husu ba tribunál kondena arguidu ho pena multa.

Defeza husu ba tribunál atu konsidera sirkunstánsia atenuante sira hanesan arguidu kolabora ho tribunál hodi deskobre verdade, hatudu nia arependementu, tanba ne'e husu ba tribunál atu fo pena Admoestasaun.

Depoizde avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

**21. Krime ofensa ba integridade fízika simples ho natureza violénsia doméstika-Nú. Prosesu: 671/2014/TD Dili**

Kompozisaun tribunál	: Juis singular
Juis	: Dr. Antoninho Helder
Ministériu Públiku	: Dra. Ivonia Guterres
Defeza	: Dra. Marcia Sarmiento (defensória públiku)
Konkluzau	: Kondena ho pena prizaun fulan 6 suspende ba tinan 1

Iha 7 Outubru 2014, Tribunál Distrital Dili, prejide leitura sentensa no kondena arguidu FBT ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 4 April 2014, arguidu basa, tuku iha ibun no rakut iha fuuk to'o monu ba rai. Kazu ne'e akontese tanba arguidu ho lezada diskute-malu kona-ba osan fulan nian ne'ebé arguidu la fó ba lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu uza direitu nonok, maibe wainhira tribunál konfirma faktus ho lezada deklara katak, faktus sira ne'e loos hotu.

Iha alegasaun finál, ministériu públiku haktuir katak maske arguidu uza direitu nonok, lezada deklara katak faktus ne'e loos hotu. Ne'e signifika arguidu provadu komete duni krime hasoru lezada. Atu halo prevensaun ba krime violénsia doméstika husu ba tribunál kondena arguidu ho pena multa.

Defeza husu ba tribunál atu konsidera sirkunstánsia atenuante sira hanesan arguidu mak responsabiliza ba nia familia, sira iha oan nain 2, tanba ne'e husu ba tribunál fo kastigu ne'ebé kaman.

Depoizde avalia faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

## **22. Krime ofensa ba integridade fízika simples ho natureza violénsia doméstika-Nú. Prosesu: 686/2014/TD Dili**

Kompozisaun tribunál	: Juis singular
Juis	: Dra. Ana paula Fonseca
Ministériu Públiku	: Dra. Ivonia Guterres
Defeza	: Dr. Sebastião Amado (defensória públiku)
Konkluzau	: kondena ho pena prizaun tinan 1 suspende ba tinan 2.

Iha 9 Outubru 2014, Tribunál Distritál Dili, prejide leitura sentensa no kondena arguidu MA tanba komete krime violénsia doméstika hasoru nia feen, iha Distritu Liquisa.

Ministériu Públiku akuza katak iha 20 April 2014, arguidu baku, basa no rakut lezada nia fuk, lori kadeira tuda too monu ba rai. Kazu ne'e akontese tanba arguidu haruka lezada ba impresta osan iha viziñu maibe viziñu dehan osan laiha.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus iha akuzasaun, hatudu nia arependementu no deklara katak depoizde akontesementu ne'e liu tiha, arguidu ba husu diskulpa ba lezada nia familia. Ministériu públiku hare katak arguidu konfesa integralmente ba faktus, tanba ne'e husu ba tribunál atu la presija rona tan deklarasaun husi lezada.

Iha alegasaun finál, ministériu públiku haktuir katak arguidu provadu komete krime violénsia doméstika hasoru lezada. Atu halo prevensaun ba krime ne'e, husu ba tribunál kondena arguidu ho pena prizaun tinan 1 suspende ba tinan 2.

Defeza husu ba tribunál atu konsidera sirkunstánsia atenuante sira hanesan arguidu kolabora ho tribunál hodi deskobre verdade, hatudu nia arependementu, tanba ne'e husu ba tribunal atu fo pena ne'ebe kaman.

Depoisde avalia faktus provadus sira ne`ebé mak produz durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

### **23. Krime ofensa ba integridade fízika simples ho natureza violénsia doméstika-Nú. Prosesu: 636/2014/TD Dili**

Kompozisaun tribunál : Juis singular  
Juis : Dra. Jumiaty Freitas  
Ministériu Públiku : Dra. Remizia de Fatima  
Defeza : Dr. Rui Guterres (defensória públiku)  
Konkluzau : Kondena ho pena prizaun

Iha 8 Outubru 2014, tribunál prejide leitura sentensa no kondena arguidu VP ho pena prizaun tanba provadu komete krime violénsia doméstika hasoru nia feen, iha Distritu Liquisa no absolve arguidu SA (oan entiado), iha krime violénsia doméstika, tanba iha momentu akontesementu arguidu sei iha tinan 15.

Ministériu Públiku akuza katak iha 23 Marsu 2013, arguidu VP (lezada nia laen) kaer lezada no arguidu SA (oan entiada) tebe lezada nia kanotak no kabun. Arguidu VP mós tebe iha lezada nia kanotak, tuku iha kotuk laran no tilun-hun. Agresaun ne'e rezulta lezada dezmaia no monu ba rai no hetan ran fakar iha orgaun seksual, sente moras no kanek iha ain, kotuk laran no iha kanotak. Kazu ne'e akontese tanba arguidu husu ba lezada, atu uza motor hodi halai buka osan (ojek) maibe lezada lakohi fó motor ba arguidu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa integralmente ba faktus iha akuzasaun, hatudu nia arependementu no deklara katak akontesementu ne'e liu tiha arguidu ba husu diskulpa ba lezada nia familia.

Ministériu públiku hare katak arguidu konfesa integralmente ba faktus hotu, no hatudu nia arependimentu tanba ne'e husu ba tribunál atu la presija rona tan deklarasaun husi lezada.

Iha alegasaun finál, ministériu públiku haktuir katak arguidu provadu komete krime violénsia doméstika hasoru lezada, atu halo prevensaun ba krime violénsia doméstika husu ba tribunál kondena arguidu VP ho pena prizaun tinan 1 no husu ba tribunal atu absolve arguidu SA husi krime ne'e tanba arguidu nia idade 15.

Defeza husu ba tribunál atu konsidera sirkunstánsia atenuante sira hanesan arguidu kolabora ho tribunál hodi deskobre verdade, hatudu nia arependementu, tanba ne'e husu ba tribunál atu fo pena ne'ebe kaman ba VP no absolve arguidu SA.

Depoisde avalia faktus provadus sira ne`ebé mak produz durante julgamentu, tribunál konklui prosesu ne`e no kondena arguidu VP ho pena prizaun tinan 1 no absolve arguidu SA.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795 Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl